

無盡意菩薩經

第一

百八
周

4778+
2



元祿九年丙子二月一日重脩
 皇城州天安寺法金剛院置
 佛日增輝 懺輪常轉
 皇圖 聖圖 帝階 綴昌

無盡意菩薩經卷第一

周

宋涼州沙門智嚴共寶雲譯

如是我聞一時佛遊王舍城如來行處寶莊
嚴堂是大功德之所修成佛一切法本行果
報包容無量諸菩薩衆其所講宣悉是無量
甚深之義皆是如來神力護持入無礙行微
妙智門其心歡喜得念進意分別智慧無輕
毀者若有稱讚歎其功德盡未來世不可窮
盡如來正覺覺平等法善轉法輪度無量衆
於一切法而得自在知衆生意盡其根源善
爲衆生斷諸習氣雖爲佛事心無所作與大
比丘六百万人悉是如來法王之子善得解

脫斷煩惱習曉了甚深無生法忍成就威儀
其行端嚴堪受供養爲衆福田善持諸佛所
說教戒復有菩薩摩訶薩衆其數無量不可
稱計不可思議不可宣說是諸菩薩於一念
頃能過無量無邊佛刹已曾供養過去諸佛
諮受妙法無有厭足常勲教化無量衆生善
解方便智慧具足其心安任無礙解脫善除
憶想取相戲論近一切智悉是補處其名曰
電天菩薩勝諍菩薩日藏菩薩勇健菩薩離
惡意菩薩遊行菩薩觀眼菩薩離闇菩薩如
是無量菩薩大士德皆如是尔時世尊入諸
菩薩所行無闕諸法門經所謂莊嚴諸菩薩

道甚深佛法十力無畏智慧成就獲得自在
揔持印門分別諸辯大神通門轉不退轉無
生法輪通達諸法同於一相於一相法不生
分別知諸衆生相性無礙善能觀察諸法實
相破壞一切諸魔境界入於通達善思惟門
能除一切煩惱諸見無礙智慧善權方便一

切佛法平等無二受持諸佛智慧之門演說
諸法如真實相憶想取相入平等門成諸功
德入深因緣莊嚴佛身身口意業念意進持
顯示四諦分別妙慧化聲聞故身心寂靜化
緣覺故得一切智化大乘故入一切法得自
在智讚歎如來諸功德故如是等門宣說開

示教導分別時佛說是大集經時於此東方
自然出現大金色光照此三千大千世界靡
不周遍除佛光明其中所有日月釋梵護世
天王諸龍鬼神皁闍婆阿脩羅迦樓羅緊那
羅摩睺羅伽所有光明悉不復現諸牆壁等
樹木叢林小山大山目真隣陀山鐵圍山大
鐵圍山及國土中間其光徹照若此世界所
有地獄皆蒙其光其中衆生光觸身時除一
切苦受微妙樂尔時佛前大衆之中其地自
然出六十億淨妙蓮華好香流布種種莊嚴
諸華雜色悅可衆心其華各有億百千葉以
寶羅網弥覆其上華質柔輒猶如天衣其有

觸者受勝妙快樂是一一華所出諸香遍滿
三千大千世界諸世界中若天若人所有諸
香悉滅不熏諸龍八部聞其香者皆得妙喜
暫離煩惱今時尊者阿難見是金色光明及
諸蓮華白佛言世尊今此瑞應誰之所爲有
是光明及諸蓮華佛告阿難有菩薩摩訶薩
名無盡意在此東方與六十億諸菩薩俱眷
屬圍遶欲來至此故先現瑞未久之間時無
盡意即以神力感動此地令大震動放無量
光雨種種華億那由他諸天人等作百千伎
樂與六十億諸菩薩衆周而圍遶來至佛所
于佛所已尋於佛前住虛空中高七多羅樹

今奉向佛出微妙音其聲遍聞大千世界即以偈頌而讚歎佛

清淨永離垢 勇健除諸欲 能滅眾塵勞

而得淨妙眼 三垢荒穢等 善斷吐洗滅

一切皆無餘 瞽盲大慈覺 除去諸怖畏

善滅無明網 十力聖主王 邪論不能伏

外道異見人 皆悉懷怖畏 猶如師子王

獨步無所懼 正覺淨光顯 無垢普照曜

天人世間中 能離一切闇 除盡眾闇冥

無有無明網 其光常顯淨 如日出雲霧

眾生老死苦 無有救護者 為調是等故

而受無量苦 能生堅慈悲 唯有等正覺

猶如大醫王
其性無有我
衆生本無性
生於大慈悲
其中多覺觀
自然到彼岸
秋月草木零
遷動不常住
解法不牢固
譬如優鉢羅
所有過去世
如來悉堪受

勤行療衆疾
譬如山谷響
無作無受者
諸有之淵海
湧溢而波浪
如蓮華在水
盛熱河池竭
愚人所親近
獨拔度有流
微妙甚清淨
及現在衆生
調不調伏故

一切諸法本
皆從衆緣生
而能爲此故
無明闇甚深
不從他聞法
行世不染汙
比智知世法
聖智所呵棄
其面目開明
過百千日月
一切所讚歎
除熱得清涼

是故我今日

稽首無上尊

度世增上福

功德無有極

如人中牛王

頂禮佛福田

尔時無盡意菩薩以如實讚讚歎佛已從空

中下及六十億諸菩薩衆頂禮佛足禮佛足

已右遶三帀於華臺上結加趺坐尔時舍利

弗白佛言世尊是無盡意菩薩摩訶薩從何

處來佛号何等世界何名去此遠近佛告舍

利弗汝可自問無盡意當為汝說時舍利弗

敬從佛教問無盡意唯善男子從何處來佛

号何等世界何名去此遠近無盡意言唯舍

利弗有來想耶舍利弗言唯善男子我知想

已無盡意言若知想者應無二相何緣問言

從何處來唯舍利弗有來去者為和合義如
和合相是無合無不合無不合即不去
不來不去不來者是聖行處唯舍利弗有來
去者即是業相如業相無作無非作無作無
非作即不去不來不去不來者是聖行處唯
舍利弗有來去者是國土相如國土相無國
土無非國土無國土無非國土即不去不來
不去不來者是聖行處唯舍利弗有來去者
即是緣想如緣想無緣無非緣無緣無非緣
即不去不來不去不來者是聖行處唯舍利
弗有來去者即因等生相如因相無因無非
因無因無非因即不去不來不去不來者是

聖行處唯舍利弗有來去者即是文字語言
如文字相無文字無非文字無文字無非文
字即不去不來不去不來者是聖行處舍利
弗言唯善男子汝今所說微妙事相吾從笈
來所未曾聞向之所疑當還啓請如主關人
若見空行若見擔者即應詰問汝所賣持悉
是何物若知種稷應收其稅唯善男子我等
如是從他聞法隨音聲解以自照心是故我
今應當諮稟汝等大士爲護大乘出生無量
聲聞緣覺唯善男子願爲分別說其來處無
盡意言唯舍利弗汝今自可諮請如來如來
當說斷汝疑網時舍利弗即白佛言唯願世

尊說是菩薩從何處來佛号何等世界何名
去是遠近若聞彼佛及世界名則令無量無
邊菩薩莊嚴菩提佛告舍利弗諦聽諦聽善
思念之吾今當說彼土功德及佛名号汝聞
是時勿懷疑懼應當一心信受奉持時舍利
弗聞是語已讚言善哉善哉世尊願時宣說
我當一心頂戴受持佛告舍利弗東方去此
度十恒河沙國土微塵等世界彼有世界名
曰不眴是中有佛号曰普賢如來應正遍知
跏行足善逝世間解無上士調御丈夫天人
師佛世尊今現在舍利弗其土無有聲聞緣
覺乃至不聞二乘之聲一切聖衆純是菩薩

已於過去久修德本善業成備布施調伏自
守防護戒忍多聞心不放逸安任功德威儀
成就忍力無礙於無上道堅固精進所修善
根一切成就諸禪解脫三摩婆提遊戲神通
大智照明善分別知一切諸法所懷慈心等
如虛空大悲堅固拯濟衆生常行喜心令彼
同歡所有捨心善滅憎愛魔網諍訟悉使無
餘善解衆生諸根所趣隨其根量授與法財
其心平等如地水火風能壞一切外道異論
摧伏敵陣建立勝幡入深佛法十力無畏於
諸大衆心無所懼常觀甚深十二因緣離有
無見行於中道我及我所衆生壽命養育士

夫作者受者斷常有無一切諸見結縛因緣
皆滅不起揔持王印而以印之所有辭辯分
別敷演那由他劫說不可盡得大神力感動
無量無邊佛土於諸佛土善能往來斷除瞋
怖憍慢放逸其所演說如師子吼一切衆生
怨親中人悉皆安止究竟涅槃法雲垂布以
興雷震三明解脫以為電光無上法雨以為
甘露能注法財三寶不斷內外清淨譬如寶
珠相好殊勝最上無比以諸善根瓔珞其身
佛法灌頂得補處位善能分別諸衆生行隨
而調伏令得解脫能淨道場坐師子座於諸
法中得無所畏能自變形猶如佛身一切佛

事悉能示現心得自在轉於法輪舍利弗彼
土純有如是菩薩摩訶薩等以為眷屬尔時
大會聞佛稱讚彼菩薩衆功德智慧踊躍歡
喜以天優鉢羅華拘勿頭華波頭摩華分陀
利華曼陀羅華散無盡意及諸菩薩異口同
音作如是言我等今日快得善利得見如是
諸正士等禮拜供養恭敬圍遶若有衆生聞
其名者亦得如是無量善利若聞讚歎稱其
功德悉皆當發無上道心說是語時大會中
有三百六十万衆生發阿耨多羅三藐三菩
提心佛告舍利弗彼佛世界無三惡道及其
名字亦無邪行越戒之名又無女人慳貪嫉

妬破戒瞋恚懈怠亂心愚癡之名及以顛礙
陰蓋集名衆生根等無上中下純是一乘無
大小名佛土無有淨穢之名亦無三寶差別
之稱不聞飢渴飲食之聲及我我所遮護之
名無諸魔網妄見集名彼佛世界平坦廣大
一日月照周匝六十億百千那由他由延是
希有事是彼菩薩本願所致其土平正猶如
手掌瑠璃衆寶雜廁共成其地柔軟猶如天
衣若有觸者受微妙樂寶樹莊嚴行伍相當
寶繩連綿以界八道所有諸華常自開敷亦
無石沙荆棘穢惡所有諸山純以衆寶而校
飾之人天無別法喜禪味以爲飲食其土無

有王者之名唯除普賢如來法王彼佛世尊
及諸菩薩不以文字而有所說彼諸菩薩唯
修觀佛諦視無馱目未曾眴即便能得念佛
三昧悟無生忍是故彼土名曰不眴云何念
佛謂不觀色相出生種姓過去淨業是時心
中不生自高不觀現在陰界諸入見聞覺知
心意識等無有戲論生住滅相不取不捨不
念不思不觀思想及非思想不分別想法想
已想無一異想境界功德內外中間不起覺
觀始終之念不觀形貌威儀法式不觀戒定
智慧解脫解脫知見十力無畏不共之法正
念佛者不可思議不造行不作想無等等離

思惟無所念無思處無陰入界生住滅想無
有處所非無處所非動非住非色非識非想
非受非行於識不生識知於地水火風不生
識知眼色耳聲鼻香舌味身觸心法亦復如
是如是不緣一切境界不生諸想我及我所
不起見聞覺知之想究竟能到一切解脫心
心數法滅不相續淨諸憶想非憶想等善除
愛恚滅因緣想此彼中間悉斷無餘是法清
淨無文字故法無歡喜不動轉故法無有苦
不味著故法無焦熱本寂滅故法無解脫性
捨離故法無有身離色相故法無受相無有
我故法無結縛寂無相故法相無爲無所作

故法無言教無識知故法無始終無取捨故
法無安止無處所故法無有住離受者故法
無有滅本無生故心數思惟所緣住法不取
其相不生分別不受不著不然不滅不生不
出法性平等猶如虛空過於眼色耳聲鼻香
舌味身觸心法是名菩薩念佛三昧菩薩得
是念佛三昧一切法中得自在智陀羅尼門
聞佛所說悉能受持終不忘失亦得曉了一
切衆生言辭音聲無礙辯才舍利弗彼普賢
如來不如此土以二因緣演說正見所謂從
他聞聲內正憶念彼諸菩薩當見佛時尋能
分別諸深妙義具足成就六波羅蜜何以故

若不取色相即是具足檀波羅蜜若除色相
即是具足尸波羅蜜若觀色盡即是具足羸
提波羅蜜若見色寂滅即是具足毗梨耶波
羅蜜若不行色相即是具足禪波羅蜜若不
戲論色相即是具足般若波羅蜜是諸菩薩
即觀佛時尋具如是六波羅蜜得無生忍舍
利弗諸佛世界嚴淨微妙少有如彼普賢如
來不眴世界時舍利弗語無盡意唯善男子
快哉仁者汝等大士得在彼土見普賢佛獲
無量利時無盡意語舍利弗大德今者頗欲
得見不眴世界普賢世尊及大眾不舍利弗
言唯然欲見今此大眾增長善根時無盡意

即入菩薩示現一切佛土三昧入三昧已令
此大衆及舍利弗尋見彼土普賢如來及其
大會見是事已即從座起合掌遙禮彼佛大
衆此會大衆以佛世尊及無盡意神通道力
得微妙華世所希有其華色香未曾見聞自
然滿掬遙散東方以用供養普賢如來華尋
遍至彼佛世界普賢如來及其大會彼諸菩
薩見是華已白佛言世尊是華嚴麗世所希
有爲從何處而來至此彼佛答言是無盡意
在娑婆世界是中亦有十方世界諸來菩薩
而共聚集能仁佛所供養恭敬尊重讚歎聽
佛世尊說大集經是其大衆所散之華彼諸

菩薩復白佛言其佛世界在何方面去是遠
近彼佛荅言諸善男子在此西方去此佛土
十恒河沙世界微塵等國彼有世界名曰娑
婆諸菩薩言願樂欲見釋迦文佛及其大衆
尔時普賢如來尋放大光其明徹照此佛世
界彼諸大衆因佛光明悉得遙見娑婆世界
釋迦文佛及諸大衆見已歡喜合掌恭敬作
如是言希有世尊其土菩薩一切大衆從何
所來而作此集遍滿其界間無空處彼佛荅
言諸善男子其諸大衆悉從十方無量世界
而來集會諮啓聽受甚深妙法時舍利弗問
無盡意誰字仁者爲無盡意無盡意言唯舍

利弗一切諸法因緣果報名無盡意所以者
何一切諸法不可盡故舍利弗言唯善男子
願仁者當說無盡法門無盡意言唯舍利弗初
發無上菩提心時已不可盡所以者何發菩
提心不雜煩惱故發心相續不希餘乘故發
心堅固不參外論故發心不壞魔不沮故發
心恒順善根增長故發心經常有爲法無常
故發心不動一切諸佛安慰護助故發心勝
妙離衰損故發心安止不戲論故發心無喻
無相似故發心金剛壞諸法故發心無盡無
量功德悉成就故發心平等利衆生故發心
普覆無別異故發心鮮明性常淨故發心無

垢智慧明了故發心善解不離畢竟故發心
廣使慈如虛空故發心曠大悉能容受諸衆
生故發心無礙智慧通達故發心遍至大悲
不斷故發心不斷善解立願故發心爲歸諸
佛所讚故發心殊勝二乘宗仰故發心深遠
一切衆生所不知故發心不敗不破佛法故
發心安隱善與衆生諸快樂故發心莊嚴一
切功德悉成就故發心善察智慧成就故發
心增長隨意施與故發心如願戒清淨故發
菩提心普及怨親具忍辱故發心難壞具精
進故發心寂滅具禪定故發心無毀具智慧
故發心無願增長大慈故發菩提心住根堅

牢增長大悲故發心和悅增長大喜故發心
不動增長大捨故發心任重諸佛所受故發
心不絕三寶不斷故唯舍利弗菩薩如是爲
一切智發菩提心豈可盡耶舍利弗言唯善
男子譬如虛空不可窮盡爲一切智發菩提
心不可得盡亦復如是無盡意言唯舍利弗
佛戒無盡因戒發心故不可盡佛定無盡因
定發心故不可盡佛慧無盡因慧發心故不
可盡佛解脫無盡因解脫發心故不可盡佛
解脫知見無盡因解脫知見發心故不可盡
唯舍利弗如來戒定智慧解脫解脫知見其
性無盡因是五衆發菩提心豈可盡耶如來

十力四無所畏十八不共法無盡因如是等
發菩提心是故無盡唯舍利弗舉要言之
一切如來悉皆無盡因是發心故不可盡三寶
不斷故無有盡衆生性無盡故無盡如實智
無盡故無盡隨諸衆生無量心行智無盡故
無盡迴向無上無盡故無盡教化衆生無盡
故無盡無盡智無生故無盡離性無生故無
盡知一切法本性無盡故無盡唯舍利弗是
名菩薩發菩提心不可盡也復次舍利弗是
菩薩心清淨無盡心清淨者不作諂故不作
諂者無姦詐故無姦詐者善分別故善分別
者無邪命故無邪命者心清白故心清白者

常正一故常正一者性殊勝故性殊勝者無
輕毀故無輕毀者滅諸曲故滅諸曲者心質
直故心質直者入平正故入平正者心堅實
故心堅實者不可壞故不可壞者性牢固故
性牢固者不可動故不可動者無所依故無
所依者除我心故除我心者無伴等故無伴
等者息些言蔑故息些言蔑者作善業故作善業
者無呵責故無呵責者消過失故消過失者
不熱惱故不熱惱者性真實故性真實者無
虛誑故無虛誑者如說行故如說行者能善
作故能善作者無瑕疵故無瑕疵者不錯謬
故不錯謬者無所滯故無所滯者不退轉故

不退轉者觀衆生故觀衆生者大悲根深故
大悲根深者善化衆生不疲倦故善化衆生
不疲倦者不求已樂故不求已樂者不貪利
養故不貪利養者不染愛故不染愛者緣諸
法故緣諸法者觀羸劣故觀羸劣者見衆生
故見衆生者常擁護故常擁護者為歸依故
為歸依者無垢累故無垢累者善觀察故善
觀察者無譏論故無譏論者心純善故心純
善者不動搖故無動搖者善清淨故善清淨
者常精進故常精進者內清淨故內清淨者
常鮮明故常鮮明者無垢染故唯舍利弗其
淨心者能斷慳惜亦化他人令斷慳惜其淨

心者能斷破戒亦化他人令斷破戒其淨心者能斷瞋恚亦化他人令斷瞋恚其淨心者能斷懈怠亦化他人令斷懈怠其淨心者能斷亂心亦化他人令斷亂心其淨心者能斷愚癡亦化他人令斷愚癡舍利弗淨心如是能斷一切諸不善法安諸衆生於善法中是

故名曰菩薩淨心不可得盡復次舍利弗菩薩摩訶薩心行清淨亦不可盡何以故菩薩行施時一切皆見捨諸所有菩薩行戒亦不可盡一切皆見持諸禁戒頭陀正行威儀無犯菩薩行忍亦不可盡一切皆見於諸衆生心無恚礙菩薩行進亦不可盡一切皆見於

諸善法精勤修集菩薩行禪亦不可盡一切
皆見於諸禪定無有錯亂菩薩行慧亦不可
盡一切皆見修習多聞是名菩薩行施行戒
行忍行進行禪行慧菩薩修行慈悲喜捨亦
不可盡一切皆見利益拔苦歡喜踊躍善斷
愛恚是名菩薩慈悲喜捨菩薩所行三業清
淨離身三惡及口四過心離三惡所謂貪欲
瞋恚邪見菩薩修學多聞無盡不憒惜故菩
薩修行無憒惜者集一切智故菩薩修集一
切智者勸餘菩薩發道心故勸餘菩薩發道
心者修行安止於善根故修行安止於善根
者願向無上菩提道故願於無上菩提道者

攝取一切諸佛法故攝取一切諸佛法者四
事攝取故菩薩修行四事攝者懺悔諸罪故
菩薩修行悔過法者發露諸惡故菩薩修行
發露諸惡者迴向一切諸功德故菩薩迴向
諸功德者積聚無量諸珍寶故積聚無量諸
珍寶者勸請諸佛故勸請諸佛者攝取諸法故
攝取諸法者行大士法故行大士法者能為
衆生作重任故為諸衆生作重任者不捨堅
牢諸莊嚴故不捨堅牢諸莊嚴者成就衆生
一切善事故

復次舍利弗菩薩摩訶薩有四行無盡何等
為四菩薩心行無盡法施無盡教化無盡善

根無盡是為菩薩四行無盡菩薩復有四行
無盡何等為四樂在空閑攝持威儀無有馱
足常樂聚集無量功德而無馱足多求學問
廣知諸義而無馱足常願無上菩提智慧而
無馱足是名菩薩四行無盡菩薩復有四行
無盡何等為四覺校計無盡覺稱量無盡覺
思惟無盡覺觀法無盡是為菩薩四行無盡
菩薩復有四行無盡何等為四覺垢因無盡
覺白法無盡呵諸煩惱無盡讚嘆白法無盡
是名菩薩四行無盡菩薩復有四行無盡何
等為四觀諸陰盡無盡觀諸界盡無盡觀諸
入盡無盡觀因緣盡無盡是名菩薩四行無

盡菩薩復有四行無盡何等為四說無常行
無盡說苦行無盡說無我行無盡說寂滅涅
槃無盡是名菩薩四行無盡舉要言之菩薩
所行一切無盡向一切智尊一切智印一切
智一切智無盡以是因緣菩薩所作悉皆無
盡是名菩薩心行無盡

復次舍利弗是菩薩心畢竟無盡何以故其
所思惟乃至一念常緣菩提而不疲倦專趣
諸地過生死故畢竟增長到彼岸故畢竟本
行轉勝增上故畢竟離負攝勝法故畢竟無
礙具足一切諸佛法故畢竟所緣增長善法
故畢竟能到過心行處故畢竟莊嚴無疲厭

故畢竟修行吉祥菩提種種苦行悉成就故
畢竟不望不求已樂故畢竟隨順無諸惡故
畢竟調伏任聖法故畢竟不雜離煩惱故畢
竟難施不悞頭目故畢竟難戒擁護犯禁故
畢竟難忍忍無力勢諸過惡故畢竟難進專
修苦行捨二乘故畢竟難定心不味著諸禪

定故畢竟難慧不著一切諸善根故發行能
到一切善事悉成就故畢竟遠離慢慢增上
慢勝慢我慢下慢憍慢邪慢善分別故畢竟
能捨施諸衆生不求報故畢竟不驚觀深佛
法故畢竟增進不停滯故畢竟無盡常精進
故畢竟不誑必為衆生作重擔故又畢竟者

調柔衆生慈覆利益諸賢善人悲心救拔諸
行惡者恭敬尊長護無護者歸無歸者照無
照者依無依者伴無伴者直諸曲者善不善
者無姦姦者淨邪命者恩於恩者及無恩者
不知恩者利不利者實虛謗者不憍慢者不
毀作者軟語教呵諸作惡者護邪行者見行
方便不以爲過於諸受者等心恭敬於餘菩
薩常行誘導以柔軟語而演教誨樂在空處
修行善法離諸利養不惜身命無有邪命心
寂滅故言無邪諂攝口過故不以邪業而求
利益其心少欲常知足故心調柔和無垢穢
故迴在生死具善根故能忍諸苦爲衆生故

是為大士一切畢竟而不可盡是菩薩心
生死煩惱永不能壞何以故是心增長諸功
德故含受一切諸衆生故成就無盡妙智慧
故大德是名菩薩摩訶薩畢竟無盡

尔時舍利弗語無盡意菩薩摩訶薩言唯善
男子頗復更有無盡法不無盡意言有菩薩
修行檀波羅蜜不可窮盡何以故菩薩摩訶
薩行施無量所謂須食與食具足命辯色力
樂故須飲與飲離渴愛故須衣與衣具清淨
色除無慙愧故須乘與乘得一切樂具神通故
須燈與燈具足佛眼清淨故須音樂者施與
音樂具足天耳清徹故須香與香身出具足

微妙香故須鬘與鬘具陀羅尼七覺華故須
塗香末香悉施與之具戒定慧熏塗身故須
種種味隨意與之味相成就故無依止者施
與依止能為衆生具足救護為證歸故須數
具者悉施與之具足究竟斷除陰蓋成就梵
天賢聖諸佛妙牀座故須座與座具足三千
大千世界以為道場金剛座麴悉成就故隨
其所須悉能與之成就菩提諸所須故隨病
施藥得無老死甘露法藥悉成就故須僕使
者皆給與之自在智慧得具足故若以金銀
瑠璃頗梨真珠珂貝璧玉珊瑚種種諸珍用
惠施者具足大人三十二相故能以種種瓔

塔施者具足八十隨形好故若以象馬車乘
施者具足大乘故若持園林以布施者具諸
禪支故若持妻子以布施者具足無上道法
愛故若以倉庫穀財施者具足諸善法寶藏
故以閻浮提若四天下隨意施者具足法王
得自在故以諸樂具持用施者具足無量法
樂樂故若持脚足以布施者法足具成進至
道場故若以手施具足法手安撫衆生令得
樂故若以耳鼻用施與者具足諸根悉通利
故若以眼目持用施者爲欲具足無礙法眼
故若以頭施於三界中具足殊勝一切智慧
故若以血肉持用施者諸不堅牢具堅牢故

若以髓腦持用施者具金剛身得不壞故善
薩不以邪命求財而行布施不逼衆生強求
他物轉以施人無恐怖施無羞耻施無慳惜
施如其所許無損減施無不愛施畢竟常施
無不畢竟施無諛諂施無姦詐施不疑業報
施無邪命施無愚癡施無不信施無不解施
無疲難施無依著施無選擇施無異相施不
求受者施無有衆生不堪受者持戒犯戒無
增減施於受者所不望報施不求名施不毀
譽施無慢非慢施無熱惱施不悔心施不自
讚施無雜穢施不望業報施無定處施無有
瞋怒垢愛等施有來乞者不惱害施無輕易

施不顙面施不撩擲施無不故施無手不與
施無不常施無斷絕施無嫉慢施無齊限施
如其所許不賀易施無有堪任不堪任施無
非福田施不輕少施不讚多施無衰耗施不
求後生施不求自在得財寶施不求釋梵護
世天王轉輪聖王諸果報施不願聲聞緣覺
乘施不求王子得自在施不爲一世故施無
厭足施無不迴向一切智施無不淨施無不
時施無刀毒施無惱衆生施菩薩行施不爲
智者之所輕笑何以故觀空寂行施是故無
盡無作所熏施是故無盡出三有相施是施
無盡不取處施是故無盡爲解脫果施是施

無盡爲伏衆魔施是施無盡爲斷結愛施是
施無盡爲增上施是故無盡善分別施是故
無盡助菩提施是故無盡正迴向施是故無
盡莊嚴道場解脫果施是故無盡是施無邊
是故無盡是施無壞是故無盡是施不斷是
故無盡是施廣大是故無盡是施無住是故
無盡是施無伏是故無盡無等等施是故無
盡是施進趣一切種智是故無盡唯舍利弗
是名菩薩修行布施而不可盡

尔時舍利弗語無盡意言善哉善哉唯善男子
仁已快說菩薩摩訶薩修行檀波羅蜜而不
可盡唯願仁者當說菩薩尸波羅蜜如諸善

薩所得無盡尸波羅蜜無盡意言唯舍利弗
菩薩戒聚六十七事清淨修治亦不可盡何
等六十七於諸衆生不起惱害於他財物不生
竊盜於他婦女中不生邪視於諸衆生無有欺
誑初不兩舌於自眷屬知止足故無有惡口
忍麤獷故無有綺語常善說故於他樂事不
貪嫉故初無瞋恚忍惡言故正見不邪賤餘
道故深信於佛心不濁故信順於法善法法
故信敬於僧尊重聖衆故五體投地志念佛
故五體投地思惟法故五體投地宗敬僧故
堅持禁戒一切無犯乃至小禁不放捨故持
不缺戒不依餘乘故持不穿戒離惡處生故

持不荒戒不雜諸結故持不汙戒專長白法
故持甚深戒隨意迴向得自在故持讚歎戒
智者不呵故持純善戒正念知故持不呵戒
一切戒不散故持善堅戒防護諸根故持名
聞戒諸佛所念故持知足戒無不厭故持少
欲戒斷貪惜故持性淨戒身心寂滅故持阿
蘭若戒離憤鬧故持聖種戒不求他意故持
威儀戒一切善根得自在故持如說戒人天
歡喜故持慈心戒護衆生故持悲心戒能忍
諸苦故持喜心戒心不懈怠故持捨心戒離
愛恚故持自省戒心善分別故持不求短缺
戒護他心故持善攝戒善守護故持惠施戒

教化衆生故持忍辱戒心無恚礙故持精進
戒不退還故持禪定戒長諸禪枝故持智慧
戒多聞善根無厭足故持多聞戒博學堅牢
故持親近善知識戒助成善提故持遠離惡
知識戒捨離惡道故持不惜身戒觀無常想
故持不惜命戒懃行善根故持不悔戒心清
淨故持不邪命戒心行清淨故持不憊戒畢
竟清淨故持不燒戒修善行業故持無慢戒
心下不憍故持不掉戒遠離諸欲故持不高
戒心平直故持柔和戒心無扞突故持調伏
戒無惱害故持寂滅戒心無垢穢故持順語
戒如說行故持化衆生戒不離攝法故持護

正法戒不違如實故持如願成就戒於諸衆
生心平等故持親近佛戒願求如來無上戒
故持入佛三昧戒具足一切諸佛法故舍利
弗是名菩薩六十七事淨治戒聚而不可盡
又舍利弗菩薩無盡清淨戒中無有猗著所
謂我人衆生壽命養育士夫色受想行識地
水火風是淨戒中無眼色相耳聲鼻香舌味
身觸意法等相亦無身心是戒定相一向不
共故是戒分別相方便緣一切法故是戒空
相得無相際不離三界故是戒不作無生忍
故是淨戒中無有已作今作當作是清淨戒
過去不滅未來不見現在不住又舍利弗是

淨戒中心淨無垢識不止住忍不親近是清
淨戒不依欲界不近色界不住無色界是清
淨戒捨離欲塵除瞋恚礙滅無明鄣是清淨
戒不斷不常不逆因緣是清淨戒無有我相
捨我所相不住身見是清淨戒不取假名不
住色相不雜名色是清淨戒不繫於因不起
諸見不住疑悔是清淨戒不住貪瞋癡不著
善根是清淨戒不惱不熱寂滅離相是清淨
戒不斷佛種求正法故不斷法種不分別法
性故不斷僧種以修無爲故舍利弗持淨戒
者相續不斷故不盡所以者何凡夫戒者在
所受生是故有盡人中十善盡故有盡欲界

諸天福報功德盡故有盡色界諸天禪無量
心盡故有盡無色界天所入諸定盡故有盡
外道仙人所有諸戒退失神通盡故有盡一
切聲聞學無學戒入涅槃際盡故有盡辟支
佛戒無大悲心盡故有盡舍利弗菩薩淨戒
皆無有盡何以故於是戒中出一切戒如種
無盡果亦無盡是菩提種不可盡故如來戒
禁亦無有盡以是故諸大士等所持諸戒皆不
可盡舍利弗是名菩薩修持淨戒而不可盡
今時舍利弗語無盡意言善哉善哉善男子
仁已快說菩薩尸波羅蜜而不可盡唯願仁
者當說菩薩羣提波羅蜜如諸菩薩所得無

盡羸提波羅蜜無盡意言唯舍利弗菩薩具
三十二事修行忍辱亦不可盡何等三十二
斷諸結故當知是忍不生害故當知是忍無
有纏故當知是忍無有惱故當知是忍無覆
蔽故當知是忍無有瞋故當知是忍無忿諍
故當知是忍無鬪訟故當知是忍於諸塵界
心不異故當知是忍護自他故當知是忍順
菩提心故當知是忍善思惟故當知是忍無
二想故當知是忍識業報故當知是忍莊嚴
身故當知是忍口演淨言故當知是忍心清
淨故當知是忍心堅牢故當知是忍言語自
在故當知是忍不憶想故當知是忍善分別

心故當知是忍護他心故當知是忍修梵世
行故當知是忍受人天報故當知是忍身相
勝故當知是忍具妙梵音故當知是忍除諸
過患故當知是忍斷諸荒穢故當知是忍斷
一切不善根故當知是忍煞諸結賊故當知
是忍於惱害衆生得超越故當知是忍具足

一切佛法故當知是忍舍利弗是名菩薩三
十二事修行忍辱而不可盡舍利弗云何爲
忍若見罵者默受不報善知音聲如響相故
見有呵責默而受之善知身相如影像相故
見有瞋者心不懷恨善知心法如幻相故忿
不報忿心清淨故聞有稱名心不生愛不自

高故聞不稱名心不生礙功德具足故若遇
榮利不生喜悅善自調故若遇衰耗不生罣
礙心寂滅故見有稱者心不驚動善知分別
故見有毀者心不縮沒其心廣大故見有譏
者其心不下善安住故見有譽者其心不高
不傾動故若遇樂事心不歡逸觀有為法無
常相故若遇苦事心不疲惱為衆生故世法
不染不依止故忍受諸苦見危逼者以身代
故忍節節支解具足覺支故衆苦加身悉能
堪受具佛身相故忍他過患善作業力故示
現燒熱修諸苦行伏外道故現入諸道出過
釋梵護世諸天故是名菩薩之忍辱也又畢

竟忍者無有諍訟何以故若見他罵我能忍
者如是忍者是觀二相非畢竟忍若言誰罵
我者如是忍辱是法功德非畢竟忍若罵眼
耶如是忍者是觀入相非畢竟忍耳鼻舌身
若罵意耶如是忍者是觀諸入非畢竟忍若
無罵者如是忍辱是觀無我非畢竟忍若知
假名如是忍者是觀響相非畢竟忍彼之與
我二俱無常如是忍者是觀無常非畢竟忍
彼是顛倒我無顛倒如是忍者是觀高下非
畢竟忍彼不勤行我是勤行如是忍者是觀
勤懈非畢竟忍彼任惡道我任善道如是忍
者是觀善惡非畢竟忍我忍無常不忍有常

我能忍苦不受諸樂我忍無我不忍有我我
忍不淨不忍於淨如是忍者是觀有對非畢
竟忍我忍於空不忍諸見我忍無相不忍諸
覺我忍無願不忍於願我忍無作不忍於作
我忍結盡不忍結在我忍於善不忍不善我
忍出世不忍在世我忍無諍不忍於諍我忍
無漏不忍於漏我忍白法不忍黑法我忍寂
滅不忍生死如是忍者是觀相對非畢竟忍
云何名爲畢竟忍耶若入空寂不與諸見和
合不倚著空是諸見等亦復皆空如是忍者
是無二相是畢竟忍若入無相不與諸覺和
合不倚無相是覺皆空如是忍者是無二相

是畢竟忍若入無願不與願合不猗無願是
願皆空如是忍者是無二相是畢竟忍若入
無作不與作合不猗無作是作皆空如是忍
者是無二相是畢竟忍若入盡結不與結合
不猗盡結諸結皆空如是忍者是無二相是
畢竟忍若入於善不與不善和合不猗於善
不善皆空如是忍者是無二相是畢竟忍若
入出世不與世合不猗出世在世皆空如是
忍者是無二相是畢竟忍若入無諍不與諍
合不猗無諍是諍皆空如是忍者是無二相
是畢竟忍若入無漏不與漏合不猗無漏諸
漏皆空如是忍者是無二相是畢竟忍若入

白法不與黑合不猗白法黑法皆空如是忍
者是無二相是畢竟忍若入寂滅不與生死
和合不猗寂滅生死皆空如是忍者是無二
相是畢竟忍若性不自生不從他生不和合
生亦無有出不可破壞不可壞者是不可盡
如是忍者是畢竟忍無作非作無所猗者無
分別無莊嚴無修治無發進終不造生若無
生者是不可盡如是忍者是無生忍無生忍
者是不出忍不出忍者是畢竟忍如是菩薩
修行是忍得受記忍舍利弗是名菩薩行忍
無盡盡意說是忍時一切大衆讚無盡意言善
男子善哉善哉快說此忍言已即兩種種希

有諸華末香塗香無數雜衣幢幡寶蓋以用
供養於無盡意百千伎樂於上空中自然出
聲作如是言若有衆生欲得如來甚深忍者
聞作是說不應驚怖時諸華香雜衣幡蓋普
遍充溢滿此三千大千世界

尔時佛告無盡意言善男子汝所供養華香
等物可自求器除去撰擋無盡意言唯然世
尊我今當以神通之力即身為器時無盡意
即入菩薩色身三昧入三昧已一切所有供
養之具悉入齋中身界如故不增不減尔時
衆中有一菩薩名大莊嚴問無盡意善男子
所入三昧名為何等而仁入已諸供養具悉

入身中身界如故而不增減無盡意言善男子其三昧者名為一切色身三昧大莊嚴言是三昧定頗復更有餘力勢不無盡意言是三昧力能令身界悉受三千大千世界所有色相身界如故亦無增減尔時衆中或有人天作是思惟寧可得見是定力不尔時佛知一切大衆人天所念告無盡意善男子汝可示現是定神力時無盡意菩薩摩訶薩於是三昧久已通達是故能以一切大衆十方諸來大菩薩等佛及聖僧悉內身中尔時其身猶如大寶莊嚴世界受諸菩薩摩訶薩等所有種種莊嚴之事是時大衆悉自見形在無

盡意菩薩身內時無盡意示現如是大神通
已是時大衆各還如本時大莊嚴菩薩摩訶
薩問無盡意善男子我從昔來未曾見聞如
是三昧神通變化無盡意言善男子假使三
千大千世界一切所有悉入我身猶無增減
況於此耶說是無盡意忍辱現大神變時七十
六那由他天及人發阿耨多羅三藐三菩提
心萬二千菩薩摩訶薩得無生法忍舍利弗
是名菩薩修行忍辱而不可盡

無盡意菩薩經卷第一

四

闕字淵海上烏玄詰問上起一不眴下音拯

濟上聲 | 蒸字上 拔也 荆棘 上音京 下音 羸提 上初 初鴈 反

掬音菊 也 手 不 沮下 才 呂 訛 蔑上 音 紫 又 上 初 鴈 反

下 莫 結 反 正 瑕 疵上 疾 斯 反 霞 下 錯 謬下 可 紫 正 作 訾 也 下

作 憊 輕 易 也 反 羞 諛 諂上 羊 朱 反 幼 下 疋 面 珂 貝

上 口 何 反 反 眷 耻上 羞 諛 諂上 羊 朱 反 幼 下 疋 面 珂 貝

下 博 帶 反 反 眷 耻上 羞 諛 諂上 羊 朱 反 幼 下 疋 面 珂 貝

傍 視 謂 之 反 傾 頭 撩 擲上 力 彫 反 亂 也 弄 也 正 上

短 不 挑下 正 作 擲上 力 彫 反 亂 也 弄 也 正 上

縮 沒上 所 又 不 挑下 正 作 擲上 力 彫 反 亂 也 弄 也 正 上

六 又 不 挑下 正 作 擲上 力 彫 反 亂 也 弄 也 正 上

不 挑下 正 作 擲上 力 彫 反 亂 也 弄 也 正 上

不 挑下 正 作 擲上 力 彫 反 亂 也 弄 也 正 上

